


optica moderna



SPRITZER + FUHRMANN

ARUBA ANSE COURANT



Diario pa



Aruba



ANJA 23

DIAHUEBS 27 DECEMBER 1962

No. 4525

Publico a laga organizadornan na caja no obstante programa atractiva presenta „Trio Huasteca” y Jossy Brokke Jr. triunfadornan den e promer Festival Antillana

ORANJESTAD — Tabata berdaderamente lastima cu asina poco publico a respalda un programa netamente di nos muchanan titula „1er Festival Antillana de Cancion” cu diabiernes anochi a worde presenta cu gran exito musical den Centro Cultural. E organizadornan A. L.D. Coffie y Marciano Arends no a spaar esfuerzonan pa presenta un magnifico show cu a hanja gran aprecio serca e poconan presente. Un consuelo a keda pa e organizadornan y esaki ta cu esnan cu a keda cas a perde un anochi divertido.

„Pakiko publico di Aruba no ta coopera cu nos artistanan local? Pakiko ora bin gruponan di afor si nan ta jena sala. Acaso nos artistanan tin menos balar?”, esaki tabata expresionnan cu nos a tende e anochi ey for di un persona cu semper a demostra gran interes den actuacion di e gruponan local. Cu mester asina tanto di e publico pa nan crece y bira mas grandi.

Un Centro Cultural hopi bashi a mira srta. Liz Croes habri e programa hunto cu su coro di diezdos mucha muher for di Savaneta. Tabata prome biaha cu nos a mira tal actuacion y mester ser bisa cu e damitanan aki ta den e bon caminda pa progreso y mas exito.

Tabata lastima si cu e sala no tabata jen.

A desfila despues gruponan mas conoci manera „Los Casinos” cu e graciosa y guapa Shirley Volkertsz tras di e microfono, „Los Caciques” cu Jossy Brokke Jr., e tres voznan di „Trio Huasteca”, Teolindo Lopez acompaña pa „Los Caciques”, „The Rola Rola Kids” den algun numero di acrobacia Ronny Brete di cantante acompaña pa „Los Casinos” y mas laat den anochi actuacion di nos prome arpista Esther de Castro, e anochi aki di cantante acompaña pa Trio Huasteca den algun alegre agualdos venezolano.

Durante henter e show tabatin rifamento di valioso regalonan como door-prize.

Ta masha poco bez nos a jega di mira durante un show un manera asina facil pa gana premionan di valor hopi

halto. E muchanan homber cu e simple gjetin cu nan a paga tabata subi escenario cu e numero ganador riba nan kaarchi di entrada y baha atrobe cu mannan jen: 1 popchi grandi y varios otro regalos empaketa.

TRIUNFADORNAN

Durante intermedio e hurado consistiendo di Rhoda Steenhuizen-Frigerio, J. de Miranda, Edwin de Cuba y A. Dereksen cu tabatin como tarea pa stipula ganador di e numero mihor interpreta y e cantante cu mihor actuacion, a duna e resultadonan.

E cancion cu a hanja mas punto tabata „El Pecador” cu 8½ puntos y a worde interpreta pa Trio Huasteca, den voz di Etty Toppenberg.

Mihor actuacion di e anochi a bai pa Jossy Brokke Jr. di Los Caciques kende tambe a hanja 8½ puntos. A sigi e ora ey entregamento di e premionan na e dos ganadornan aki. Srta. Liz Croes a haci entrega di e plaketa na Trio Huasteca y despues el a haci mescos cu e precioso copa cu a bai den man di Jossy Brokke Jr.

Un ovacion grandi pa parti di e publico a demostra cu ki gran alegria e decision di e hurado a worde ricibi.

Cu cada grupo actuando un biaha mas despues di entremedio a jega un fin na e dibertido nochi Antillano aki.

Un biaha mas tin cu bisa cu e Premier Festival Antillana de Cancion a merece mas publico. Ta mihor pa na momento di bai organiza e segundo festival otro anja, pa bini cu mas propaganda y pa scoge un fecha no mucho Pega cu e fiesta di Pascu. E ora ey nos ta kere cu e festival antillana lo hanja e merecido respaldo grandi di e publico.